

## Morning Dogri (NSD)

### National News

13-04-2025

1. प्रधानमंत्री नरेन्द्र मोदी होर अम्बेडकर जयंती दे मौके उपपर हरियाणा जाइयै केई सारी विकास परियोजनाएं गी शुरू करोआडन।
2. कलकत्ता हाईकोर्ट नै पच्छिम बंगाल दे मुर्शिदाबाद जिले च हिंसा दे मददेनजर केन्द्री बलें दी फौरी तैनाती दा हुक्म दित्ता ऐ।
3. 2026 ब'रे दे पद्म पुरस्कारें लेई इस ब'रे 31 जुलाई तगर नामांकन कीते जाई सकडन।
4. भारत दा विदेशी मुद्रा भंडार 10 अरब 80 करोड़ डालर बधियै 6 सौ 76 अरब डालरें शा मते दा होई गेआ ऐ।
5. अमरीका नै देशै च आयात कीते जाने आहले स्मार्टफोन ते कंप्यूटरें गी हालिया टैरिफ थमां छूट देने दा ऐलान कीता ऐ।
6. भारती मौसम विभाग नै अज्ज असम ते मेघालय च भारी बरखा दी पेशगोई कीती ऐ।
7. तीरंदाजी विश्व कप स्टेज-1 दे कम्पाउंड मिक्सड टीम मुकाबले च, भारत दे ऋषभ यादव ते ज्योति सुरेखा वेन्नम दी जोड़ी नै सुन्ने दा तगमा हासल कीता ऐ।

<><><><><><>

### PM-Haryana

अंबेडकर जयंति दे मौके उपपर प्रधानमंत्री नरेन्द्र मोदी होर कल हरियाणा दे हिसार जांगन जित्थें ओह हिसार ते अयोध्या बशकार हवाई सेवा दी शुरूआत करगंन। प्रधानमंत्री होर हिसार हवाई अड्डे पर इक नमें टर्मिनल भवन दा नीह पत्थर रखगंन ते जनसभा गी बी संबोधत करगंन। प्रधानमंत्री मोदी होर यमुनानगर च विकास परियोजनाएं दा उद्घाटन ते शिलान्यास करगंन। मोदी होर उत्थें आए दे जनसमुदाय गी संबोधत बी करगंन। प्रधानमंत्री होर यमुनानगर च 800 मेगावाट दी छमता आले दीनबधु छोटू राम थर्मल बिजली सयंत्र दा नीह पत्थर बी रखगंन। श्री मोदी होर यमुनानगर दे मुकरबपुर च कंप्रेसड बायोगैस प्लांट दा नीह पत्थर बी रखगंन। प्रधानमंत्री होर भारतमाला परियोजना दे तैहत 14.4 किलोमीटर लम्पी रेवाड़ी बाईपास परियोजना दा बी उद्घाटन करगंन। इस परियोजना दी लागत 1 जहार 70 करोड़ रपे ऐ।

<><><><><><>

### WB Highcourt

कलकत्ता हाईकोर्ट नै वक्फ संशोधन कानून दे बरोध च पच्छिम बंगाल दे मुर्शिदाबाद जिले च बड्डे पैमाने पर हिंसा, भन्न-तोड़ ते अगगजनी गी दिक्खदे होई केन्द्री बलें दी फौरी तैनाती दा हुक्म दित्ता ऐ। विधानसभा च विपक्ष दे नेता सुवेन्दु अधिकारी हुं'दी याचिका पर न्याऽमूर्ति सौमेन सेन ते राजा बसु चौधरी हुं'दी पीठ नै एह आदेश दित्ता। श्री अधिकारी होरें अपनी याचिका च राज्य दे केई हिस्से च हालात बिगड़ने दा आरोप लाया हा। अदालतै इब्बी आखेआ ऐ जे होरनें जिलें च बी ऐसे हालात पैदा होने पर केन्द्री बलें दी फौरी तैनाती होनी लोड़चदी ऐ। मुर्शिदाबाद च होई दी हिंसा च 3 लोक मारे गेदे न ते हिंसा दे सरबंघै च तकरीबन डेढ़ सौ लोकें गी गिरफ्तार कीता गेदा ऐ।

<><><><><><>

### **WB Violence**

पच्छिम बंगाल दे मुर्शीदाबाद जिले च होई दी हिंसा दे मददेनजर केन्द्री गृह सचिव गोविंद मोहन होरें कल राज्य दे मुख्य सचिव ते डीजीपी हुंदे कन्नै वीडियो कांफ्रेंस राहें बैठक लाई। इस मौके पर पच्छिम बंगाल दे डीजीपी होरें उ'नेंगी दस्सेआ जे हालात तनोतनी आहले पर काबू च न ते हालात उप्पर लगातार नेडमी तक्क रक्खी जा'रदी ऐ। उ'ने इब्बी गलाया जे हिंसा दे मामले च 150 लोकें गी गिरफ्तार कीता गेदा ऐ ते पच्छिम बंगाल पुलिस आसेआ मुकामी सतह उप्पर तैनात बीएसएफ दी सहायता बी लैती जा'रदी ऐ। तोआई गृह सचिव होरें गलाया जे राज्य सरकार दी गुजारिश पर बीएसएफ दिएं होर बाददू 5 कंपनिएं गी पच्छिम बंगाल च तैनात कीता गेआ ऐ। उ'ने राज्य प्रशासन गी सलाह दित्ती जे ओह होरने संवेदनशील जिलें च बी हालात उप्पर नेडमी तक्क रक्खन ते तौले शा तौले हालात सामान्य बनाने लेई लोडचदे उपाऽ जकीनी बनान। गृह सचिव होरें इब्बी आखेआ जे केन्द्र सरकार बी हालात उप्पर लगातार तक्क रक्खा'रदी ऐ। उ'ने राज्य सरकार गी हर मुमकन मदाद दा जकीन दोआया ऐ।

<><><><><><>

### **Padam Awards**

अगले ब'रे दे पद्म पुरस्कारें लेई इस ब'रे 31 जुलाई तगर नामांकन कीते जाई सकडन। नामांकन दी प्रक्रिया जंदी 15 मार्च थमां शुरु होई गेदी ऐ। पद्म पुरस्कारें लेई नामांकन ते सफारशां छड़ियां राष्ट्री पुरस्कार पोर्टल पर गै स्वीकार कीतीआं जाडन। चुने गेदे पद्म पुरस्कार विजेताएं दे नांऽ अगले ब'रे गणतंत्र दिवस पर घोषित कीते जाडन।

<><><><><><>

### **Foreign Exchange Reserves**

भारत दा विदेशी मुद्रा भंडार जंदी 4 अप्रैल गी खत्म होए दे हफ्ते च 10 अरब 80 करोड़ डालर बधियै 6 सौ 76 अरब डालरें शा मते दा होई गेआ ऐ। रिजर्व बैंक पास्सेआ जारी हफतावार आंकड़ें मूजब, पिछले हफ्ते दे दरान विदेशी मुद्रा संपत्तियां 9 अरब 7 करोड़ डालरें शा बधियै 5 सौ 74 अरब डालरें शा मती होई गेइयां न। देशै दा सुन्ने दा भंडार इक अरब 56 करोड़ डालरें थमां मता बधियै 79 अरब 36 करोड़ डालर होई गेआ ऐ। एह्दे अलावा, अंतर्राष्ट्री मुद्रा कोष च रिजर्व बैंक दी स्थिति 4 करोड़ 60 लक्ख डॉलर बधियै 4 अरब 46 करोड़ डॉलरें दी होई गेई ऐ।

<><><><><><>

### **HM-Bhopal Visit**

केन्द्री गृहमंत्री अमित शाह होर अज्ज भोपाल च मध्यप्रदेश सरकार आस्सेआ आयोजित राज्य सतह दे सहकारिता सम्मेलन च मुख्य परौहने दे रूपै च शिरकत करगंन। इस कार्यक्रम दा आयोजन अंतर्राष्ट्री सहकारिता ब'रे दे अंतर्गत कीता जा'रदा ऐ। सम्मेलन च दुध ते डेयरी उत्पादें दे सब्बने हिजधारकें दे प्रतिनिधि हिस्सा लैगन। इस मौके पर मध्यप्रदेश सरकार राज्य दे डेयरी उद्योग दे विकास आस्तै सैहयोग समझौते पर दस्तखत करोग। इनें सैहयोग समझौते बारे मध्यप्रदेश दे मुख्यमंत्री मोहन यादव होरें हाल च गै ऐलान कीता हा। उनें आखेआ हा जे इस गैह कन्नै दुध उत्पादकें दी आमदनी बधने दे कन्नो कन्नी दुध उत्पादन च बी बाद्धा होग।

<><><><><><>

## US Tarrif

अमरीका नै देशै च आयात कीते जाने आहले स्मार्टफोन ते कंप्यूटरें गी हालिया टैरिफ थमा छूट देने दी घोषणा कीती ऐ। यूएस कस्टम्स एंड बॉर्डर प्रोटेक्शन दी सूचना दे मताबक, एह उत्पाद राष्ट्रपति डोनाल्ड ट्रंप हुंदे आसेआ लाए गेदे 10 फीसद वैश्विक टैरिफ ते चीन पर लाए गेदे 145 फीसद टैरिफ थमा बक्ख रक्खे गे न। एह छूट ओकड़े उत्पादें पर लागू होग जेहड़े 5 अप्रैल थमा अमरीका च प्रवेश करी चुके दे न जां फही गोदामें थमा अग्रे रवाना करोआई दित्ते गेदे न। तोआई, भारत ते अमरीका बश्कार दपक्खी बपार समझौते दा पैह्ला चरण बी ट्रंप प्रशासन दे निर्धारित 90एं दिनें दे टैरिफ-विराम दे अंदर पूरा होने दी मेद ऐ।

<><><><><><>

## SC Ruling

सुप्रीम कोर्ट नै आखेआ ऐ जे राष्ट्रपति होरें गी राज्यपालें आस्सेआ राष्ट्रपति दी मंजूरी लेई आरक्षित राज्य विधेयकें पर 3 महीने दे अंदर अंदर फैसला करना लोडचदा ऐ। न्यायमूर्ति जे. बी.पारदीवाला ते न्यायमूर्ति महादेवन हुंदी पीठ नै इक फैसले च आखेआ ऐ जे इस अवधि च जेकर कोई देर रौहदी ऐ तां फही ओहदे वैध कारण दस्सने चाहिदे ते सरबंधत राज्यें कन्नै सांझा कीते जाने चाहिदे। पीठ नै तमिलनाडू दे राज्यपाल आर.एन.वि हुंदे आस्सेआ दस लंबित विधेयकें गी मंजूरी नेई देने दे फैसले गी खारज करी दित्ता ते इस उप्पर फैसला सनाया के राष्ट्रपति गी बी राज्यपालें आस्सेआ भेजे गेदे विधेयकें पर फैसला लेने च 3 महीने शा मते समें नेई लैना चाहिदा। जेकर तैह समें सीमा दे अंदर कोई कारवाई नेई कीती जंदी तां फही राज्य गी न्यायलयें च जाने दा हक्क होग। सुप्रीम कोर्ट नै एह साफ कीता जे जेकर संवैधानिक चिंताएं दे कारण कोई विधेयक राकेया जंदा ऐ तां फही अनुच्छेद 143 दे अंतर्गत राष्ट्रपति सर्वोच्च न्यायलय थमा सलाह लैन।

<><><><><><>

## IMD Weather

भारती मौसम विभाग नै अज्ज असम ते मेघालय च भारी बरखा दी पेशगोई कीती ऐ। मौसम विभाग नै केरल, माहे ते समुंदरी कंडूहे आहले आंध्र प्रदेश, यनम, रायलसीमा ते तेलंगाना च बी तेज ब्हां चलने दे कन्नै गरज-चमक कन्नै बरखा बरने ते ऐन-गड़ा पौने दे असार दस्से न।

<><><><><><>

## Archery

अमरीका दे फ्लोरिडा च, तीरंदाजी विश्व कप स्टेज-1 दे कम्पाउंड मिक्सड टीम मुकाबले च, भारत दे ऋषभ यादव ते ज्योति सुरेखा वेन्नम दी जोड़ी नै सुन्ने दा तगमा हासल कीता ऐ। भारती जोड़ी नै कल रातीं इक रोमांचक मुकाबले च चीनी ताईपेई दे के.हुआंग जाऊ ते चेन चीह लुन दी जोड़ी गी हराइयै ख़ताब जित्तेआ। कम्पाउंड मिक्सड टीम मुकाबले गी ओलंपिक च शामिल करने दे फैसले दे बाद भारती टीम नै पैहली बारी एह प्रतियोगिता जित्ती ऐ। अंतर्राष्ट्री ओलंपिक समिति नै 2028 दे लॉस एंजिल्स ओलंपिक खेड्डें च कम्पाउंड मिक्सड मुकाबले गी शामिल करने दा हाल च गै फैसला कीता ऐ।

<><><><><><>

## IPL

आईपीएल क्रिकेट च जंदी रातीं हैदराबाद दे राजीव गांधी अंतर्राष्ट्री स्टेडियम च होए दे मुकाबले च सनराईजर्स हैदराबाद नै पंजाब किंग्स गी 8 विकटें कन्नै हराई दित्ता। 10 मुकाबलें च पंजाब किंग्स दे खलाफ सनराईजर्स दी एह 9मीं जित्त ही। तोआई अज्ज जयपुर

दे सवाई मानसिंह स्टेडियम च दपैहरी मगरा साङ्ढे 3 बजे राजस्थान रायल्स दा मुकाबला मेजबान रॉयल चैलेंजर्स बैंगलुरु कन्नै होग। तोआई दुए मुकाबले च दिल्ली दे अरुण जेटली स्टेडियम च दिल्ली कैपिटल्स दा मुकाबला मुंबई इंडियंस कन्नै होग। एह मैच सं'झां साङ्ढे 7 बजे थमां खेड्ढेआ जाहग।

<><><><><><>